





1732



敬業堂詩集
+





Centimetres

TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color Black





敬業堂詩集卷二十三目錄

甘雨集

五月二十四日 駐蹕密雲連夕大雨

謝 賜普洱茶 喀喇火屯口占

蔣酉君同年為余寫芙蓉折葦扇頭小景戲題二

絕 七月朔烏城立秋


七月十五日四更發熱河度嶺至喀喇火屯天未

明

七月十六日烏城直廬驚聞房師虞山公訃音哀

情痛切托於短章四首

題酉君為家少詹姪畫四時花卉卷二首



座主總憲吳公請假旋里恭賦四律寄送

題少詹姪寫經圖時在塞外直廬

八月十三日 駕幸翁牛特恭紀時八公主下嫁

於都倫郡王 木克帶西行十八里山下

有湯泉 中秋夜柳林口翫月與王

符先生及亮功紫滄西君三同年小飲偶成十

六韻 八月十九日 皇太子睿

賜初白菴扁額恭紀十六韻

塞外大風二十四韻索同直諸公和

行經玲瓏山下 八月二十三日 上入山

行圍射獲白鹿一頭恭紀十韻

西君分餉黎藕賦謝十六韻

道旁冢 重過玲瓏嶺看霜林作十

二韻 聞同年顧書宣前輩湖廣

訃音愴懷今昔成五十韻

院長惠裘襲賦謝十韻

謝院長贈馬十二韻 半截塔次院長韻

院長惠家製金銀花露一瓶賦謝二十韻

重陽日度木倫喀喇沁

雪後隨 駕度汗鐵木兒嶺

重過唐山營 發波羅火屯至藍旗營

自星龕岩歸至烏城道中重見霜林西君有詩再

次前韵

九月十四日烏城旅舍連

接諸弟諸兒兩孫八信口占一律

重陽後十日入古北口

石匣城南村民有駕牛墾田者 上駐蹕親履田

間扶犁行百餘步一時觀者萬人咸謂 聖

主重農勸穡至意真千古所未有臣身叨侍從

目覩盛事恭紀二十韻

俞扶九寓齋賞菊分韻得時字

題張研齋前輩桃花流水圖小照

敬業堂詩集卷三十三目錄終

敬業堂詩集卷三十三

海寧 查慎行 悔餘

甘雨集 起丙戌五月盡九月

入夏以來畿輔稍旱自五月二十一日 駕發西苑

大雨五晝夜田疇霑足萬口歡呼咸謂 聖天子軫

念民生甘霖應期不禱而自至視靈雨甫田諸什不

既多乎哉臣以珥筆隨豹車之後沐膏澤而咏豐年

固其職也

五月二十四日 駐蹕密雲連夕大雨

輦路涼生暑乍融到來連夜雨兼風四山雷轉車聲外

万帳燈浮水氣中入夢似聞泥滑滑占晴行見黍芄芄

頻年眊筆慙無補枕上吟成願歲豐

謝 賜普洱茶

洗盡炎州草木烟製成貢茗味芳鮮筠籠蠟紙封初啟
鳳餅龍團樣並圓 賜出儼分甌匝月淪時先試道旁
泉侍臣豈有相如渴長是身依灑露邊

喀喇火屯口占

水無蚊蚋地無蝻寺有幡幢石有龕山是膏腴溪是乳
草如桑葉馬如蠶

蔣酉君同年爲余寫芙蓉折葦扇頭小景戲題

二絕

偶拈秃筆寫霜容點綴誰知不取濃會得江湖清氣味

兼葭只合倚芙蓉

塞垣歸思入秋多欲涉江湖奈晚何一葦可杭吾亦去
詩翁莫嘆葉沉波

七月朔烏城立秋

行宮六月全無暑早覺涼生大火中客裏心情原草草
老來光景又匆匆千山朔氣初迎雁一雨秋聲盡入蟲
笑指伊蘇河畔柳三年與爾共西風

七月十五日四更發熱河度嶺至喀喇火屯天

未明

塞天暑亦涼矧此秋候變披衣起我早熟路馬重踐群
峯競高低孤月遞隱現參差樹交影斷續雲流片長風

從西來過耳劇噶箭行行得平地星火遙可辨嵐霧滄
然蒸橫前舖白練道旁有雙塔隔手不復見礪絕賴橋
通泉鳴知徑轉忽聽一聲鐘微茫識 行殿口外無佛
鳥城 行宮 慶新 創穹覽 寺琳 霄觀

七月十六日鳥城直廬驚聞房師虞山公訃音

哀情痛切托於短章四首

公去京華日余方扈從時

癸未秋先生奉太夫人乞假南還余時方隨駕口外

三年歸失約一別見無期昨寄書猶達

前月接家弟德尹揚州信云端

陽前與先生同渡江初傳病尚疑何當聞訃後驚發早秋悲

涑水攜書局蓬山入選樓

去春奉旨於揚州校刊全唐詩 奉親 恩

最渥給俸禮仍優

在籍官俸從來無此例也 風格詩篇著儀容

畫像留

先生出都時留秋帆畫卷命題後復奉手書命慎行校閱歷年詩集 到頭天莫問

公自有千秋

壯歲官情澹懷歸至性真科名無媿色

庚辰殿試公第一人及第

巖壑早收身穉子將周晬高堂正六旬懸知方易簣俯

仰劇傷神

歷憶追隨地多慙屬望情早曾同座主

癸酉鄉試慎行與先生同出清

溪徐公廬陵彭公之門

老及作門生寢爨知何日心喪痛失聲灤

河兼淚雨滴滴向南傾

題酉君爲家少詹姪畫四時花卉卷二首

乍驚五色江郎筆幻出黃筌四季花知是餘波多綺麗
未妨游戲亦名家

吹開吹謝自年年人世風災絕可憐一片丹青非色界
四禪天是養花天佛書有初禪二禪三禪四禪天至四禪天始無風災

座主總憲吳公請假旋里恭賦四律寄送

乞歸偏在 眷深時臺望非公更屬誰岳峙淵渟瞻氣

象蒼松白石表襟期久持綱紀群僚肅獨抱冰霜 聖

主知真喜太平多盛事大臣進退總逶迤

法曜文星並一垣高從河漢溯淵源回瀾力比鈞衡重

下士心忘副相尊秘閣有書皆博覽岩廊何事不深論

即看拜疏辭 朝後尚引肩輿到苑門公前赴西苑辭歸上特命肩

輿至小東門慰問賜茶真異數也

詔恩暫許憇林間不比尋常賦遂初別路人皆期健飯

引年公未及懸車一門老去仍同慶八座歸來只舊廬

何物眼前當七發尊鄉亭外有鱸魚

一時祖帳盡名流才子同朝挽不留三殿文章行接武

五湖風月侍歸舟蒹葭隔岸雞催曙橘柚開園雁報秋

我是歐陽門下士柴車何日獲從游

題少詹姪寫經圖時在塞外直廬

我觀人世間知巧競一途乃臣事所生虛名亦求沽不

見古孝子用心常近愚愚則本乎樸樸為誠所孚苟有

禪於親寧論事有無嗔經祈冥福此語傳浮圖庶幾抱

微誠上蒼父母劬通乎立教意可以輔吾儒宮詹吾宗

賢至性具髮膚少稟二人訓學優過庭趨出為鸞鳳鳴

歸作膝下雛中承贈君訃痛絕天難呼北堂垂白母爲
爾增歎吁黽勉進水漿傷哉反哺烏母氏繼下世兩喪
一時俱平生風木悲血泪交糝糊君時年盛壯頓覺形
神臞霜寒宵寢磚味苦晝茹荼旁人競相勸勸保七尺
軀似聞西方經報恩古有諸親恩等山岳子報真錙銖
遂發寫經願寸心懷區區悼前一瓣香几上墨一盂竭
我兩眼力拚我十指瘡眼昏指如椎口誦足雙跌誦已
還慟哭罷復紉書如此踰兩年白抽頭髻須當其迫
沈痛信筆非臨撫果然妙蓮華一一紙上敷一卷萬餘
字七卷七萬餘人天合掌敬燦若琳琅珠俞子亦好手
爲君寫成圖今來十五霜故山拱楸梧偶然展卷看清

泪猶承臚我生乃鮮民踪跡歎早孤先人尚淺土齒髮
日夜枯作詩志吾媿汗出成沾濡

八月十三日 駕幸翁牛特恭紀時八公主下

嫁於都倫郡王

一統車書域三朝雨露天名藩星拱極 法駕日臨邊
遐裔元家貴崇姻 聖代聯肅雖輿衛盛錫賚禮文全
事與和親異 恩加屬國專不煩湯沐邑特給水衡錢
甸服居相近華風被獨先丹青開殿宇錦繡裹山川封
爵原仍舊王庭遂不遷副車常侍 輦駙馬每從田負
弩鸞鑣下呼萬豹仗前從看外孫國望幸自年年
木克帶西行十八里山下有湯泉

北行漸入苦寒鄉喜見湯泉湧道旁自覺温能回黍谷
或云下必有砂牀波痕消盡冰霜氣石髓流為草木香
便作解衣盤礴地暫時休澣也清涼

中秋夜柳林口翫月與玉符先生及亮功紫滄
酉君三同年小飲偶成十六韵

露白霜清候千巖万樹頭銀河斜繞塞金鏡迥懸秋輪
自東隅上光從西極流天長雄鼓角野静散貔貅星火
移躔避關山倒景收賞應同北闕興不減南樓蕭爽
披襟得高空與目謀幾年叨扈從一夕抵旬休已免攜
衾直還為秉燭遊王程千里共恩賜兩宮稠佳果充
拌按鮮禽入膳羞班荆傳酒令隔幔數更籌餅似團圓

樣詩須酌酌訓老狂尤爛熳小坐獨遲留明日追成夢
吾生咲若浮起來林影下嵐翠濕衣裘

八月十九日 皇太子睿賜初白菴扁額恭紀
十六韵

地近瞻 儲聖天高鑒積誠三光開 睿筆四海識菴

名夙昔棲禪志今來戀 闕情青雲垂欲上白髮正初

生有作皆邀 賞非才竊自驚蓬茅沾雨潤葵藿向陽

傾感激桑榆晚駢馳歲月更去家無累遣下直有僧迎

往往誇儕輩時時話 寵榮一瓢蟠木瘦 三秀紫

芝莖匣許香楠貯 賜帶 孟教淨水盛 頰黎 白卮傳漢玉

綠硯琢洮瓊是物皆堪供 以上六種皆兩 何年築始成

雖蒙頒扁額未敢計柴荆
蟻蝨微生賤龍蛇尺幅盈
方釣餘腕力恩重倍難擎

塞外大風二十四韵索同直諸公和

天上箕星動山中月暈生
土囊俄出口沙磧欲填平
猛拔群峰立喧招萬籟迎
奔衝來若驚颯沓去如傾
牛馬渾難辨蛟龍怒欲爭
蓄威雷隱鱗助氣鼓砰鉤
劔戟齊攻壘波濤迫撼城
餓鴟當晝叫饑虎傍人行
鼠黠藏深穴蟲僵踞斷莖
草埋蛇鼻淺寒噤蝟毛撐
昨夜還防雪今朝竟得晴
駢雲成片段轉石落崢嶸
鴉起斜行亂雕盤遠勢成
向南惟雁路直上是鵬程
曠本難終日狂猶逞二更
將收偏作力忽散寂無聲
谷以虛能受心緣靜

不驚勿愁開橐籥祇是聽
竽笙袞袞除塵埃悠悠拍
旆旌回頭千樹禿稱體一
裘輕酒近移床暖爐添宿
火明却看天宇曠翻覺塞
垣清落帽知何處飄蓬且
自征蘭臺多賦手小律倘
同賡

行經玲瓏山下

鑿開渾沌得玲瓏片石居然絕
塞雄地肺想從巖竇入天台
信有石梁通風雲噓吸千尋
表日月迴環一竅中莫怪經
過屢回望佳名却與故山同

余鄉餘杭縣亦有玲瓏山

八月二十三日

上入山行圖射獲白鹿一頭

恭紀十韻

白鹿非凡種仙山歲月長
出當時有道瑞叶壽無疆

洞口眠時月原頭望處霜明明開射的皎皎入圍場碧
斲千鈞鏃瑤星一道芒最宜矚並獻肯與豹深藏至潔
斑同雪如膏色勝蒼皮能留素質草不療金創雕狙充
庖味銀毫耀眼光謬慙陪羽獵作頌比麟祥

西君分餉黎藕賦謝十六韵

行厨滋味重肥膩饜牛羊正爾宜佳果俄看致滿筐遠
分慈母惠特並故人嘗藕抱玲瓏質黎含沆漉漿嫩疑
新出水紅似乍經霜洗剔親教淨摩娑愛倍常大瓢斟
雪汁小片截瓊肪鬆脆鳴牙頰芳鮮潤肺腸真堪解消
渴况乃佐清涼我本柴桑士居連苻藻塘踏泥風葉底
摘顆露籬旁賣菜多求益堆盤輒賤償幾曾虛野饋長

是及隣莊物理因希貴人情感舊長鑿池從憶白入谷
每思張二者今兼得何須問故鄉

道旁冢

其一在土城南岡上石獅二白碑一統
其一在土城東十里石几一石亭二上

刊孝敬之墓四字
姓名皆無可考

衰草茫茫近土城白碑相望兩荒塋當時馬革尸同裹
今日牛眠地總平野火漫容荆棘長塞田并乏子孫耕
有知合咲曹瞞拙欲刻征西占墓名

重過玲瓏嶺看霜林作十二韻

鞏確重來路秋容最好時往年經雪早今歲得霜遲二
月花相似干林景特奇問名難辨種設色故多姿濃淡
丹黃葉交加爛慢枝簇來成綺繡踈處度旌旗換眼層

層別迴鞭步步隨已憐侵暮色還與發華滋粧點江南
畫鋪張塞外詩衰顏熏欲醉白髮巧相欺好事何人賞
登高此地宜丁寧朔風候旦晚莫狂吹

聞同年顧書宣前輩湖廣詩音愴懷今昔成五

下韻

絕塞來函問初疑後果真難埋厚地狂欲問蒼旻憶
昔充鄉貢時同忝國賓紅箋通姓氏麗正約比隣名稍
居姜後癸酉同舉克兆書重名在十八西溟十九余二十心常與顧親雁行聯
弱羽魚隊狎凡鱗雨雪連床數篇章擊節頻嗜嘉良有
癖遭砭各無嗔搜剔疵瑕出銷鎔鑛鐵純偷來輪格律
讀罷爽精神自爾投膠漆何曾計屈伸禮闈看再舉臚

唱聽移旬獨脫囊中穎先呈席上珍列科登一甲同榜

得三人金馬聲華盛芝蘭臭味均甲戌殿試書宣第一甲第二丁丑西溟一

甲第三庚辰余房師汪公自忘頓下第翻羨早抽身干君

甲戌冬乞假回籍病喜鷗情適閒教鶴性馴落帆揚子夜踏月

廣陵春出處都如夢參商那記巡分攜從甲戌會合又

庚辰却話青雲舊俱添白髮新木樨叅佛法黃葉證前

因黃葉打醒游于夢木樨叅透老僧景已當搖落衰拚

向隱淪未成棲倦翼寧免作勞薪元老開黃閣微名達

紫宸壬午冬余因京江相國寸長嗟莫效六論咲空陳

釋褐推先輩舍毫托後塵我仍留輦下君亦起漳濱

癸未冬書宣方還朝花底隨朝謁燈前惠討論詞源寬萬頃筆陣

敵千鈞妙斲斤能運竒方手不龜輿圖歸拍掌道路識
迷津乙酉冬書宣奉 旨入直 南薰殿纂輯方輿路程 乙覽皆稱善公才久

合掄使車方簡命省試且陶甄場屋收羅鄴門墻進郗
詵為爐分玉石握管稱金銀瑁琮徒喧訪從容視咲顰

不慙膺 特眷彌覺重詞臣純進士榜 發後事 遂啟扶風帳重
持大雅輪楚材傳自古儒術近尤振辭 闕還瞻戀之

官亦苦辛行期何苒苒別語太諄諄君于初春奉督學 湖廣之 命四月 中乃出都臨行時 頗以善病為慮 北轍俄經夏時余扈從 避暑口外 南轅似隔晨

鯉書猶待寄鵬賦忽遄臻江漢文星墜瀟湘士氣泯雖
云蒙 寵異寔未展經綸澤國秋多慘騷人例豈循歸

旌千里遠宦况一生貧憔悴孤踪在淒涼往跡湮老年

殊少泪痛極為沾巾

院長惠裘一襲賦謝十韻

推解情何厚炎涼序忽遷初過搖扇景已迫授衣天蒼
腋茸交密銀貂色最鮮製成微霰候拜賜朔風前輕暖
渾踰帛竒温又勝綿禿襟便跨馬短後稱垂鞭楊襲隨
時尚冰霜是夙緣曉披迴醉纈夜脫聳吟肩袖裏攜新
卷箱中感舊瓊敝裘從唱和回首十三年癸酉冬余作 敝裘詩先生

與西溟實君元 龍皆有和章

謝院長贈馬十二韻

廿載曾徒步三年會上雍借驢長自咲騎馬忽相從華
廐蒙分賜貧家慮乏供品應超脫兔種本出飛龍宋時 學士

例賜飛
龍廐馬
突過風前影難尋月下踪
蹴水蹄似鉄批竹耳
成鋒一色全凝雪
三花待刷鬃
密看毛細膩垂愛尾鬢
鬆王濟雖多癖
孫陽詎易逢
駟馳憐盛壯
剪拂愧衰慵
捷徑休爭取
歸途幸見容
最宜隨下澤
安穩代扶筇

半截塔次院長韻

龍沙茫茫荒怪集
佛界剷天絕梯級
誰與此塔此山中
高湧蓮華嵌空立
大千起滅微塵過
小劫須臾轉輪急
頑礪亂礫泐作堆
風雨猶疑鬼神入
當時委蛻兩夫婦
華表歸來改城邑
相傳元時有某万户與其妻
棄官學佛後舍葬于此
冰天下
壓巔頂平雪谷深埋半腰
及我來訪古興桓地欲寫山
川入行笈
每逢陳跡輒徘徊
口業未停餘宿習
草間定

有碑銘在野火燒殘沮洳濕
國書難考竒渥温筆授惜
少鳩摩什公詩紀實良足徵
歸去皇輿付編輯

院長惠家製金銀花露一餅賦謝二十韵

佳名傳本草舊識鷺鷥藤
黃白移時變金銀任俗稱
但聞蕪葉曬寧解帶花蒸
方法誰邊得園林手種曾
栽培無棄物筐筥亦時登
籬密開從徧枝繁采勿勝
製乘香未散候視氣先騰
倒挽河車水徐收井甃繩
夜窗珠滴瀝晨旭露鮮澄
澹比初融雪清於乍釋冰
恍疑仙掌露直向玉盤凝
出火經三日浮餅貯半升
諒非供熱客間或餉良朋
邊地尤難致塵襟豈易膺
流匙宜少許瀉盞感多承
點酒竒芬溢和茶別味增
唇沾良已足肺潤更

相應沆瀣浴仙侶醅醕問老僧薔薇紅莫擬玫瑰紫休
矜白戰聊成咏慙無故事徵

重陽日度木倫喀喇沁

亂山高下入圍場掠面西風似弩強馬足聲乾干澗葉
雁群寒警一裘霜登臨豈必皆吾土今古閒消幾夕陽
記取題糕重九節燎毛燔肉共分麇

是日撤圍
賜麇一頭

雪後隨駕度汗鐵木兒嶺

校獵秋初罷回鑾雪乍零雲峯晴晶晶風磴曉泠泠
換景供吟筆收圖入畫屏方株枯樹頂獨愛一松青

重過唐山營

去日村村翠剡堆歸時碌碌廣場開天教朔野西成早

又待君王射兔來

發波羅火屯至藍旗營

劍分一嶺隔西東

自駱駝嶺東北為校獵之區其西南則山莊也

半月風光迥

不同沙磧人歸黃落後山家烟起翠微中年豐障塞秋
先穫水落浮橋路盡通誰信古來甌脫地築場樊圃入
幽風

自星龕岩歸至烏城道中重見霜林西君有詩

再次前韵

過眼當揺落繁華又一時地非千里遠候較兩旬遲
日晨猶麗烘霞暖更奇黃留將雪景紅發未霜姿秀拔
多喬木輪菌乏醜枝似燒原上火愛映酒邊旗猶憶衝

炎去曾經緩轡隨綠陰晴借爽潤色雨添滋忽換登高
展來題看葉詩含情如見待有信不吾欺榮悴天難主
妍媸分各宜本非松與栢那免受風吹

九月十四日烏城旅舍連接諸弟諸兒兩孫八

信口占一律

燈花如穗吐烟煤果有家書出塞來三處豈應同日發
八函却喜一時開勸餐兄弟憐年長到眼兒孫抵夢回
爲報老懷殊不惡地爐羶帳撥寒灰

重陽後十日入古北口

踏徧雲中雪外山敝裘重脫柳重攀寒花過節如迎客
朔雁先期已度關官馬散隨黃犢卧戍兵秋較老農閒

勞生屬有駢馳分默數三年六往還

石匣城南村民有駕牛墾田者 上駐蹕親履

田間扶犁行百餘步一時觀者万人咸謂

聖主重農勸穡至意真千古所未有臣身叨侍

從目覩盛事恭紀二十韵

雲捲三秋稻霜清百頃陂 君王除警蹕郊甸正鉉基

近接 鸞輿過群瞻 玉趾移羽林分仗立耕耒執鞭

隨龍見天垂象牛馴 帝解縻沾犁皆雨露被隴即京

坻久悉艱難意重蒙疾苦咨事傳千載盛 恩豈一夫

私自昔豐稜慶嘗聞史冊垂紺轅曾屢駕黛耜亦頻施

千畝周官籍三推月令儀大都修典禮已謂致恬熙幾

見勤民 主行當省歛時西疇躬自蹈田器手親持積
厚培尤力居高履愈卑九州胥樂土 萬乘是農師擊
壤歌相勸吹幽繪總宜大歡聲動地風遠播為詩作所
陳無逸釐成付有司小臣慙頌述振古孰如茲

俞扶九寓齋賞菊分韻得時字

關榆塞柳別經時一夕從君那得辭衝雪人過重九節
傲霜花剩半開枝寒香迺夜差宜酒病眼經秋漸怯詩

記取燈前論聚散明年相憶在東籬

時余將請假南歸


題張研齋前輩桃花流水圖小照

時在西苑直廬

北風夜狂轉冬律墜葉堆寒瑟瑟生納忽展橫幅圖
暖氣春回映簾日垂楊夾岸水沒篙碧色染透胭脂毫

晴霞燒空半天赤點出万株深淺桃玉堂學士神仙客
每到花時懷舊陌鷺鷥翹足鷗翎下有鰕魚長一尺
船頭舉網船尾炊何如斫鱸留蓬池披圖空看畫中景
對鏡微添頰下髭我昨南帆經古皖棹入樅江春過半
至今清夢繞龍眠二十六峰紅不斷可憐此地不相逢
却在雲窗霧閣中青筋綠篔何日辨且教閒處付漁翁

敬業堂詩集卷三十三



敬業堂詩集卷三十四目錄

西阡集

恩賜白金二百兩恭紀十韵

乞假葬親南歸 睿賜驟馬二匹恭紀二十韵

將出都留別院長及同直諸公四首

與潤木別於彰儀門外

晚抵良鄉

早過涿州

五更發高碑店

食安肅菜

渡三义河沙滋唐三水合流於此

重入東鹿境宿清官店先寄兒建十二韻

乙亥秋與許霜巖同過深州忽忽十二年矣重經

此地題壁依然時許遠宦滇南口占寄之
饒陽道中作
曉發河間黃昏抵大城縣

奉謁座主少宗伯許公於大城官署敬呈二律
曲路店遇吳元朗
大風抵張夏戲題旅壁

崗山栢
長清山行

泰安州題壁
長至日山左道中即目書

懷二十四韻
羊太傅故里

新泰城南望嶽山
旅店食雉兔作

蒙陰城東十餘里地名城子莊壬午初秋曾一飯
於此水旱之餘居民百餘家轉徙殆盡惟舊時
逆旅主人在耳感歎不已紀之以詩

抱犢詞

古明鏡詞

沂州出山

淮北聞雁

從宿遷登舟連夜渡河
黃河中流見月出口占一絕

發清江浦二首
重晤大司農徐浩軒先生

於淮上二首
張運青先生見餉食物遣

人遠致于四十里外以詩奉謝

寶應兩泊
曉晴發寶應喜得順風先

寄德尹揚州
掛帆行六十里將抵界首

風勢轉狂小舟不敢下閘戲成二絕

高郵道中
大雪夜泊瓜洲二首

雪後渡揚子江
舟過丹陽有感於范堯夫

事漫成一律

三十年來舟過無錫未嘗

再游惠山口占解嘲

膠山在無錫縣東四十里九域志云山南有梁蕭

侍郎故宅今無可考矣

渡尚父湖晚抵虞山二首

過錢玉友河亭話舊二首時已收身奉佛但未廢

飲耳

與許暘谷時許初自山右

歸

西阡雜感五首

除夕與德尹信菴守歲二首

迎鑾集

園梅垂放而主人將出門口占一絕

錢玉友有見寄長篇極論作詩之旨終以傳世相

期許兼承不朽之託連日阻風虎丘舟中無事

賦此奉酬

夜泊京口

奉和座主相國澤州公吳橋道中見寄之作敬次

原韻

院長揆公出都時亦有詩

見寄清江舟中出以索和奉次原韻並簡唐東

江考功

揚州城外觀燈船和友人

韻二首

題湘雨禪師宙亭詩集後

師乞余作序故落句及之

初登金山

清明喜霽再登金山同院

長作

雨後隨 駕發龍潭抵江

寧

紀十二韻

隨 駕謁明太祖孝陵恭
院長見贈大篇過蒙推獎

次韻奉酬

自葑門至崑山舟中作

立夏日吳山寓樓偕竹垞朱先生及鄭息廬馬衍

齋素村家德尹為櫻筍之會竹垞有詩和荅一

首

雨中隨 駕泛舟西湖次

院長韻五首

昭慶僧樓同年佟淵若學

士步月見訪

和淵若學士西湖雜咏四

首

雨中過南湖訪老友盛鶴

江二首

隨 駕重至虎丘寓直仰

蘇樓下

聞建兒到家之信

吳門舟次喜遇潤木假歸

重酌惠山泉

奉謁侍讀秦公於寄暢園

敬呈五章

麥秋

邵伯埭送 駕後歸舟即事二首

與德尹自揚州連舫渡江

入夏苦旱六月十五早偕鄉人禱雨烏龍井步至

菩提山真如寺二首

耳聾

十月十七日病起過隣僧

融然房看菊


周濂溪先生家塾銅章一

枚形製奇古其裔孫歷世寶藏來索題句敬賦

一章

天寧詩僧文緯見過

敬業堂詩集卷三十四目錄終



敬業堂詩集卷三十四

海寧 查慎行 悔餘

西阡集

起丙戌十月
盡十二月

凡詞臣請假葬親者例移吏部須六年俸滿方與彙
題余自癸未入館甲申授職通計前後歷俸未滿四
年丙戌秋杪隨駕歸自口外於直廬冒昧陳情叨
蒙聖恩俯允所請誠異數也回思先母見背已三
十五年先君棄養已二十九年矣長恐溢先朝露負
土無期今乃得買地西阡歸營大事吾子若孫履斯
阡也當念貧家葬親之不易益感聖朝卹下之深
仁則茲集所留特涕泗之痕而已

恩賜白金二百兩恭紀十韵

竊祿清華地霑 恩湛露天朱提頌少府白鏹逮微員
優倍三年俸榮踰萬選錢貺非金穴比 旨自玉堂宣
重馬歸時載空囊補處穿春衣還質庫客座設青氊暴
富隣翁問長貧爨婢憐每持清白誠長望子孫賢不敢
辜 君惠行將置墓田孤生餘頂踵感涕為光先時先人尚
未營葬將以賜金買地

乞假葬親南歸 睿賜騾馬二匹恭紀二十韵

連騎 東朝出輝煌照路岐來從疾藜苑產自渥洼池
騾馬名雖別龍麟種並孳漆光明似鑑騾色純黑紫皎潤無
疵馬色純紫抖擻塵沙淨開張骨骼奇八蹄行互舉雙尾立

交垂共飲無踈齧同槽免繫維曹韓師畫理湛岳比妍

姿東坡詩馬中湛岳有妍姿天廐方登用房星忽下移聯翩驚異數

蕃錫荷 恩私臣本駑駘質生逢 特達知昨來衣白

袷今去鞚青絲屬有駢馳分員當愛惜騎芻苜慙厚給

鞭策敢輕施每憶重經處寧忘徒步時雪深東郭履寒

勒灞橋詩歸徑逡巡識有人指點疑力衰輸盛壯心在

莫追隨數齒殊多感齊衡轉自嗤長鳴同戀 主臨發

又遲遲

將出都留別院長及同直諸公四首

有生長恐負 君親白首清班忝後塵蘭畹草生聊自
託鳳池鷗入亦相馴關門柳色三經夏苑路花光四及

春總是 恩波最寬處就中容得濫竽人

窀穸先人久未營隨身挈涕每縱橫微官敢作歸田計

聖主能憐負土情篋有 賜書裝不薄囊惟襍被累差

輕只慙驚鈍宜長放尚與驂駟逐隊行去年九月 皇

年十月 皇太子賜驃馬一疋院長亦曾惠馬故及之

勿論解組與彈冠直為 天高仰報難情重繞朝新贈

策夢深星瀨舊投竿 九重禁闥深巖地七品年勞本

分官倘許衡茅專 壑猶能曝背話 金鑾

得歸未掃舊巢痕用東坡詩中意 去住心孤但自捫列宿回瞻

天北極單車獨赴國西門檀溪屋老將誰主粟里田蕪

尚有村長羨冥鴻在寥廓不曾輕受稻梁恩

與潤木別於彰儀門外

自我住京師五年裘換紵名成時已晚 恩重歸敢遽

子臣虞兩負方寸亂徐庶請急太匆匆痛深創寔鉅親

亡未克葬貧到傷心處追憶初喪時悲端非一緒汝時

尚角州至性本天具今來強仕踰將伯寔堪助同歸苦

未得時弟亦欲乞假而未遂 万事料難預送我出修門殷殷戒徒

御我行營大事家督難自恕饑凍固其常兒孫何足慮

來騎蹇驢來去駕柴車去風吹日杲杲飄散蘆花絮灑

淚各無言哀歌聊自叙

晚抵良鄉

近畿積雨後大道成塗泥舊時攔馬墻今作蓄水堤眼

中有岐徑涉足恒恐迷正賴孤塔高前行辨東西南來
者誰子賓從相排擠光輝溢路旁簇簇千輪蹄倉卒爲
引避我車若雞栖

早過涿州

曙色朦朧十里橋城端雙塔聳峩層冰欲裂風何橫
濃日如熏霧忽消新闢河淤半蕪沒舊攀沙柳尚蕭條
出畿便是田園路南望三千未覺遙

五更發高碑店

久作京華客鄉程夢易迷分明茅店月猶誤早朝雞

食安肅菜

老夫居貧曾種菜露韭霜菘成替代竭來竊食大官厨

百糶黃虀剩餘債歸程晚經安肅縣一碧環城雪初蓋
流涎大似逢麪車願朶腸鳴難久待頃筐雖乏園官送
求益何妨擔夫賣銀刀削葉土銚烹柔滑清甘美無對
花猪肥豎真堪唾野飯村沽差足配家童相顧旁愕眙
不信主人心篤愛我願當官知此味脍剝毋爲里閭害
又願民間無此色春社祈年秋報賽菜畦不蠖田不蝗
過客盤餐聊一快

渡三义河沙滋唐三水合流於此

百里平陂際白沙滋唐兩派滙三义樹頭小扇風旗影
舊識中羊名村賣酒家

重入東鹿境宿清官店先寄兒建十二韵

上谷南來少戍墩

自張墩以南道旁無墩

天寒日薄易黃昏重穿

野水平沙路又宿柴門老樹村地遠郊圻殊僻左人隨

歲月劇驚奔遠迎何敢煩丞尉

黃丞趙尉至此相迎

再到惟欣長

子孫顧我便能偕隱否問渠可有去思存

時兒建循例量移將離任

矣一家飽暖踰初望百里絃歌盡國恩捧檄當時聊

自慰折腰今日且休論仰邀天幸年頻稔下賴民淳訟

少冤成就汝為無過吏保全家是舊清門雖無餘力營

三徑已忝蕙名達九閩酒盞久拋思共把燈花何喜

遽能繁明朝飲馬滹沱側好對清流驗鬢痕

乙亥秋與許霜巖同過深州忽忽十二年矣重

經此地題壁依然時許遠宦滇南口占寄之

飛鴻一散天南北拍爪痕從壞壁留惆悵城南獨吟客

夕陽隨影過深州

饒陽道中作

我前冬日暖我後北風狂向背苟異宜一身判陰陽矧

乃別形體疾痛焉能詳造物豈不仁饑寒盈道傷目存

力匪逮惻惻中自傷

曉發河間黃昏抵大城縣

瀛海東來路漫漫百里長田荒薪比桂潦退鱸如霜牛

跡迷朝霧鴉聲散夕陽誰憐畿內地經眼有蒼涼

奉謁座主少宗伯許公於大城官署敬呈二律

一城斗大控河壩析木遙從天漢連永賴渠成傳万世

暫勞公出已三年時子牙河堤告成報績不遠矣棠陰樹樹堤邊柳膏

澤村村葑上田漳滏漳沱皆底績不曾輕費水衡錢

秩宗兼職領司空畿輔行看奏禹功憶送檀車衝朔雪

重來冰署坐春風何人愛士同迂叟從此歸田望醉翁

準備籃輿候三徑先傳鄉信到江東

曲路店遇吳元朗

去國非初約相逢泪一揮余因營葬出君亦帶星歸時元

朗丁衰柳催蓬鬢枯風裂布衣半生知己分到此倍依

依

大風抵張夏戲題旅壁

四幅帷裳巧障風到來村巷聚兒童此中閉置疑新婦

一咲那知是老翁

崗山栢

戢戢排行欲及千黃楊小厄故依然廿年野火荒山道
看爾幾成劫後仙

長清山行

曉露趁殘更荒雞失次鳴嚴霜升井氣落木走風聲
道衝沙聚山牆叠石成大都生瘿俗磊塊總難平

泰安州題壁

少負狂名老好竒逢山興發尚淋漓如何十度城南宿
不敢輕題望岱詩

長至日山左道中即目書懷二十四韵

一線添歸日初陽放曉晴細泉水底咽枯草燒餘萌土
齊逢人問年衰換節驚滿前憐凍餒即事歎淒清此地
初荒旱相傳半死生 至尊憂獨切當事責差輕足陌
千緡給留漕方數盈不教移積粟專欲活殘甦碩鼠成
羣聚哀鴻四散鳴民貧寧樂禍官賑特空名受爵能無
愧增階竟冒榮牛羊難問種雞犬乍聞聲正使流亡復
懸知疾苦併如何經儉歲尚爾廢深耕粟餘郵亭麗修
治平聲道路平成旗雙隻堠墟落短長程僅免追呼擾幾
同力役征辛勤借婦女率作及兒嬰望幸心雖結安巢
計未成 皇仁終見憫吏治亟宜更自咲犁鋤叟來隨
商旅行何曾受芻牧直是惜娶悃暖律回鄉夢寒灰付

宦情所祈年穀熟終老卧柴荆

羊太傅故里

班書源可考系出泰山羊世已經千載魂應戀故鄉功
名論際會氏族閱興亡峴首沈碑後何須感歎長

新泰城南望整山

孤峯截斷連山脈大似人間獨立人地湧雲根浮縹緲
一名青雲山天生石骨瘦嶙峋仰瞻泰岱旁無附平揖徂徠
近作隣不用多生開草木免教榮落改冬春

旅店食雉兔作

頻歲叨陪獵秋田雉兔肥中官馳馬 賜侍從掛鞍歸
北上何年再南烹此味稀經過慙野饋寂寞慰朝饑

蒙陰城東十餘里地名城子莊壬午初秋曾一
飯於此水旱之餘居民百餘家轉徙殆盡惟舊
時逆旅主人在耳感歎不已紀之以詩

敗茅頽壁兩三間百室漂流偶一還記得往年題句在
豆花棚下看蒙山

抱犢詞

桃墟道中見一老奧抱
黃犢騎驢而行戲作

東村牛旣秋不熟別向村西買黃犢買成抱上蹇驢騎
驢尾稀如翁鬢禿驢今馱翁復馱畜步步施鞭母乃酷
人情厚薄從古然或加諸膝或墜淵

古明鏡詞

見道旁醜
婦而作

人間有真色嬌者顏如蓮東家欲效之紅白調朱鉛衆

方賞塗抹羣謂醜者妍好女不自明詎藉旁人憐妍媸
果若從人定何用團團鑄明鏡

沂州出山

沙淺沙深窅復均一行疎樹帶烟郊山經齊魯青纔了
馬渡泲沂碧未膠小圃重樊因枳椇浮橋粗就賴蘆茨
經旬尚滯黃河北漸喜魚羹入客庖

淮北聞雁

風急霜清欲渡淮數聲客夢鷺鷥回與誰好作江湖伴

東坡詩我衰寄江
湖老伴雜鷺鴨

憐汝亦從邊塞來殘月曉催千片落

長天寒曳一繩開蓮房菰米沈波後集澤群多亦可哀

夏秋之交淮
南北皆被水

從宿遷登舟連夜渡河

勞筋貪暫息買棹聽漁歌漸與江淮近自然鴻雁多涸沙無斷岸急浪有盤渦忽報晨水合吾舟已渡河

黃河中流見月出口占一絕

誰謂河流濁吾疑徹底清一眉殘月影鏡裏看初生

發清江浦二首

南來步步遠風霾州路晨征一倍佳竹筴蒲帆渾不用櫓聲如雁下長淮

編蘆縛荻聚成堆大舸多從江外來試問老堤堤畔柳年年辛苦為誰栽

重晤大司農徐浩軒先生於淮上二首

邊風朔雪灑重裘猶記鋒車一夕留却到淮陽冬候暖

滿窗紅日話中秋

中秋前先生復于柳林口行帳中

命至塞外盤桓半日

河堤本是司空職計相重乘使者軺館閣人情久延竚

江湖粗了合還朝

先生以大司農兼翰林掌院教習庶常似不應久于外故云

張運青先生見餉食物遣人遠致于四十里外

以詩奉謝

見說官廚儉淮流孰與清於公無媿色餉我見真情追送煩郵使分嘗偏老兵道傍傳異事此客勿相輕

寶應雨泊

冒雨衝泥取次行多年不聽滴篷聲此聲好是治聾藥老耳孤燈分外清

曉晴發寶應喜得順風先寄德尹揚州

安宜城外雨餘天晨旭初生血樣鮮湖似貫珠行不盡

秦少游詩高郵西北多巨湖纍纍相連如貫珠雲隨飛鳥勢爭先離心各抱三

年外短夢難禁兩日前一事報渠差快意好風添送順

流船

掛帆行六十里將抵界首風勢轉狂小舟不敢

下閘戲成二絕

閘口狂風撼柁樓隄邊驚浪聚浮漚何妨暫作須臾住

只笑荒灣遇石尤

石尤風緊人知避我獨逡巡避順風不謂有風行不得

掛帆何必急流中

高郵道中

北風吹折蒹灘蘆四無頃畝純浸湖周遭三十六陂水

中置一城形覆盂蔣之奇詩中間可以置城隱然高阜如覆盂城頭角聲曉

如訴城外人家半漁戶我來正及積潦收但見飛鳧導

前路買魚射鴨值幾錢所愁米貴廚無烟水鄉作客大

不易嗟爾居民誠可憐

大雪夜泊瓜洲上首

茱萸灣北晨沽酒瓜字洲南夜泊船我自只如常日醉

人言風雪滿江天

歸途未免防冰雪一月晴和竟似春今日漁簑堪入畫

天公原不薄歸人

雪後渡揚子江

廿里風程一霎間，海門晴色帶潮還。
白頭浪裏參差影，看盡江南雪後山。

舟過丹陽有感於范堯夫事漫成一律

郵籤朝過曲阿城，又是江東第二程。
一刺投名羞俗態，十年爲客見人情。
當時已少郭元振，故友誰如石曼卿。
預遣家書刻歸日，兒童不用遠相迎。

是日遣老僕先歸

三十年來舟過無錫，未嘗再游惠山口。
占解嘲來往如梭，三十年不曾重酌德池泉。
他時終作法雲老，償取平生未了緣。

膠山在無錫縣東四十里，九域志云山南有梁

蕭侍郎故宅今無可考矣

蕭蕭雁鶩鳴枯蒲，南朝侍郎宅有無。
膠山漸近惠山遠，中隔芙蓉一片湖。

渡尚父湖晚抵虞山二首

烟村雨浦通灣濶，忽入澄湖杳藹間。
常愛大癡橫幅好，不知粉本在虞山。
長松高下蔭坡陀，老柳參差蘸碧波。
咫尺吳門風景別，山塘十里稻堆多。

過錢玉友河亭話舊二首時已收身奉佛但未
廢飲耳

團蒲旁着一龕燈，韁鎖中無杜伯升。

事見東坡詩

長恐入門

遭痛棒對君吾是啞羊僧

不愛天花作道場方緣消盡酒難忘

白樂天有何處難忘酒詩從今

方丈維摩室添辦清香祀杜康

與許暘谷時許初自山右歸

一咲還家未覺貧奉承堂上白頭親可憐我亦稱人子

負米歸來晚為身

少陵詩負米晚為身每食臉必泣

西阡雜感五首

銜恤三十年今方卜城域有身彌自痛負土假人力

其二

兩山如玦抱一水縈紆注落葉滿西阡別家墳上樹

其三

坡陀非丈五馬鬣是新封小著樊籬護須防鹿觸松

其四

墓田故無多又占數間屋庶望子孫賢既耕且還讀

其五

一門四兄弟去住難自主丙舍幸已成神傷對牀雨

時潤

木乞假未得

除夕與德尹信菴守歲二首

馱雞芻酒餞殘年魄歲鄉風自昔傳不為盤餐營口腹

老來情味合歸田

家貧未免思游宦及至成名累有官畢竟商量何計穩

白頭兄弟一堂難

迎鑾集

起丁亥正月盡一年

丙戌偪臘抵家營先人塋事畢將於西阡築舍爲
休息計會 天子閱河南巡在籍臣僚例應遠迎

明年正月買舟渡河隨 鑾自淮陽抵江寧至蘇

杭五月初於高郵送 駕再展六月之假乃復歸

里通計一年中息肩不過二百日懶不作詩僅得

如干首

園梅垂放而主人將出門口占一絕

冰雪禁繁葢莓苔裹老枝吾閒猶未得不謂爾開遲

錢玉友有見寄長篇極論作詩之旨終以傳世
相期許兼承不朽之託連日阻風虎丘舟中無

事賦此奉訓

吾觀工畫人胸本蘊丘壑雲烟資變幻山水赴脈絡又
聞國手碁惜子不輕落翻新布奇勢全局如一著良醫
去成見因病施方藥巧匠先量材運斤乃盤礴羿射無
詭遇騶琴有醪攬高僧厭苦空八棒解拘縛老仙出狡
獪九鎖啟橐籥惟詩亦去然衆美視斟酌神功須力到
佳境豈意度人皆信手成孰肯苦心作同心得錢子洞
見非隔膜惜哉方逃禪此道付糟粕偶然一吐露萬象
互醞酢足知精進幢隨事無退却投篇過推許不量余
所作平生知已分夙昔慎唯諾寧待遲暮年重爲不朽
託君其益自愛藏藁手親削

王友近編所作詩
九卷名撫雲集

夜泊京口

誰信勞生有路難，山川猶作故鄉看。
風翻石壁連城動，潮滿江船出口寬。
細火一星疑遠市，重裘二月尚春寒。
東君不管梅花信，任向高樓笛裏殘。

奉和座主相國澤州公吳橋道中見寄之作敬

次原韻

時扈澤南巡

浮浮薊北烟曖曖，江南樹聞公陪輦。
出延佇，凡幾度。早梅已飄香繁杏，亦修嫿。惟占燕雀喜，詎觸蛟蜃怒。
挂席下清淮，馳情快前遇。詩高有孤唱，興愜無長路。
絮暖茱萸灣，風輕桃葉渡。舊遊吟未足，更向湖山去。

院長揆公出都時亦有詩見寄清江舟中出以

索和奉次原韻並簡唐東江考功

清音天半落松杉，吟傍仙舟響亦凡。
夜雨一篙平岸水，春蒲十幅渡河帆。
不辭醉咏花欹帽，預擬題襟墨漬衫。
為報東江老居士，速馳詩遞答來函。

揚州城外觀燈船和友人韻二首

琉璃一片映珊瑚，上有青天下有湖。
岸樓臺開畫錦，船舫絃索曳歌珠。
二分明月收光避，千隊驪龍逐仗趨。
不為水嬉誇盛事，萬人連夕樂堯衢。

錦纜朱欄綵鷁群，滿川春暖氣如熏。
倒窺銀海千枝燄，迸散金波五色雲。
雁齒初裝虹有暈，魚鱗不動水無紋。
君王到處皆勤政，猶自宵衣坐夜分。

晉王隱題湘雨禪師宙亭詩集後師乞余作序故落句
及之

九僧歿後名僧少今見詩中第十人傾倒盃囊千斛水
洗空衣衲七條塵秋田領鶴精神爽春谷聞蘭臭味親
不敢與師多作序欲離文字證前因

初登金山

齋鐘浴鼓平生夢垂老方成鳧蹕遊忽聽潮聲分兩派
信知樹影在中流千檣雲霧浮孤墪三島樓臺聚一漚
終脫朝衫穿野袖卓菴閒地幸相留

清明喜霽再登金山同院長作

片飄重過潤州城曙色東來海氣晴千點桃花一江水

妙高峰下作清明

雨後隨 駕發龍潭抵江寧

晨隨羽衛發龍潭雨氣初收日色暹驛路馬嘶泥滑滑
野田雉雉麥漸漸六朝烟柳攀曾岍三月風花賣酒帘
擊壤吹幽聲一槩尚煩 停蹕聞芡檐

隨 駕謁明太祖孝陵恭紀十二韻

明祖山林在 天家祀典昭千官隨虎旅 萬乘駐鸞
鑣風雨東來近江關北睇遙石城蟠脈厚靈谷蓄泉饒
狐兔何曾窟松楸竟不凋運雖經鼎革 詔特禁芻蕘
下馬坊猶聳稜恩殿忍燒遺民安率土 聖主念前朝
本以仁除暴還同舜紹堯統傳心有契社廢廟無祧陵

戶煩增置神宮儼舊寮霸圖卑六代園寢任蕭條

院長見贈大篇過蒙推獎次韵奉酬

騷雅本正聲沿流乃盡變前賢不苟作寸錦勝匹練自
從篇什繁觀者目易眩公才擬日星有作万人見圭璋
既特達氣類必引薦賞奇神有交嗜善誨不倦手持大
圓鏡盡攝諸方彥高談折深源小智窮曼倩伊余好嗟
咏宿昔弄柔翰駑駘百舍趨追驥不及半人言桃李春
自顧桑榆晏雄辭荷獎借照眼驚璀璨穆穆被清風嚶
嚶發將旦和章如草木披拂聊供觀

自葑門至崑山舟中作

鯉魚橋外綵旗斜乙未亭邊鼓笛譁六十四涇烟水色

半隨

鳳船泛桃花

鯉魚橋乙未亭皆在葑門外見丘
與權築塘記六十四涇詳吳郡志

中

立夏日吳山寓樓偕竹垞朱先生及鄭息廬馬

衍齋素村家德尹爲櫻筍之會竹垞有詩和荅

一首

夏木陰中夏日長小樓西面吸湖光簾櫳昨夜猶春雨
花事今年偶故鄉佳節重逢知幾度白頭一咲抵千場
朱櫻紫筍家園味容易山廚得飽嘗

雨中隨 駕泛舟西湖次院長韵五首

看山曾向雨絲中青苧竿頭弱柳風今日船從天上坐
亭臺不與昔年同

沿隄畫槩愛徐行但換橋坊不改名水墨圖中天一色
鷺鷥幾點去分明

澄波何處著纖埃寺面多從鏡裏開放鶴亭邊聊一憇
居僧猶記探梅來

搖曳垂楊淺水灣心隨魚鳥欲忘還裏湖行盡外湖出
又露西南兩角山

老去論詩敢自豪從公遊興尚陶陶袖中攜得西湖去
十幅吟箋勝薛濤

昭慶僧樓同年佟淵若學士步月見訪

滿川烟火氣熏蒸誰解敲門問老僧多謝同年能見訪
上樓初點佛前燈

是夕湖訪烟火最盛

和淵若學士西湖雜咏四首

短牆高閣俯層瀾中有幽人洗眼看漫道放船隨處好
烟波終讓外湖寬

時淵若寓段橋外

雙鳩啼雨又連朝濕翠濛濛隔岫遙好片蘇公隄畔柳
映人騎馬渡虹橋

賀監狂名老在無酒船一櫂未應孤心知不及閒鷗鷺
拂雨翹烟占此湖

四圍圖畫本天成三面雲山一面城多少才人吟不盡
尚留佳句待先生

雨中過南湖訪老友盛鶴江二首

幾稍新竹透籬根一片蒼苔印屐痕六七年來閒不出

感君為我特開門

烟雨迷離又一春舊遊如夢亦如塵萬緣消盡詩名在
猶替南湖作主人

隨 駕重至虎丘寓直仰蘇樓下

好片生公石重來似十洲為逢僧話舊猶認仰蘇樓

聞兒建到家之信

為貧而仕全家出末路何堪久別離書卷拋來飽魚蠹
田園荒後長榛茨急流自信差能退廉吏誰云不可為
比似遷官還校喜燈花為汝報歸期

吳門舟次喜遇潤木假歸

誰傳遠信自京華聞汝歸程漸有涯驟見尚疑俱作客

昨歸翻怪不同車半年冰雪愁為減一飯江湖勸互加
錯料老夫詩是識白頭兄弟盡還家
于去年除夕詩有白頭兄弟一堂難
之句故云

重酌惠山泉

千章老樹蔭淨泓不忝茶經第一名急借匏尊蠲久渴
旋敲石火試新烹僧無吝色從多汲客有餘甘為一清
挈得餅罌須穩載免教地主累張衡

奉謁侍讀秦公於寄暢園敬呈五章

石龍噴沫轉堦除平碧中涵萬綠俱信是有源能不竭
旁分一派給僧厨
合抱凌雲勢不孤名材得並豫章無平安上報 天顏

喜此樹江南只一株 園中樟樹一本乃數百年物上嘗傳問此樹無恙故云

山光水色盡沾恩 風月兼留雨露痕 堂中有山光水色松風水月諸

額皆十餘年來御筆屢次題賜者 頭白村翁傳盛事 鑿與六度幸

名園

德門子弟槐荀陳再見瓊枝玉樹新 謂洛生喬梓 却笑平泉

空作記世家難得是文人

韓公文體杜詩名謝傳家聲白宦情四海只今無執友

從遊應許老門生 辛酉先生典試江西廬陵彭公是科所得士慎行癸酉舉京兆又出彭公

門下例得稱門生

麥秋

桑疇宜暖麥宜寒 宵旰憂勤亦少寬親見江淮民樂

業清和天氣好 回鑿

邵伯埭送 駕後歸舟即事二首

埭南埭北鯿魚肥斗野亭邊興不違說與故人應惜別

千帆送盡一帆歸

高寶中央地最低秧針浮水水浮畦霑沙雨足牛蹄健

萬頃湖田盡架犁

與德尹自揚州連舫渡江

梅花開後草堂前進擬春來共醉眠此福兩人消不得

半年五上渡江船

入夏苦旱六月十五早偕鄉人禱兩烏龍井步

至菩提山真如寺二首

淡月朦朧般若臺沈沈海岸蔽黃埃可憐我本無田者
足甌荒山乞雨來

臯蘇遺廟在巖阿

潛說友臨安志云鹽官縣東七十里有烏龍井廣四尺深七尺冬夏不竭

相傳臯蘇二將軍逐黃巢死於此因祠焉紹興十年歲旱禱雨即應勅賜濟福廟額在寺南六里

古井

年深不起波好笑兩三垂白叟便思泥首致滂沱

耳聾

五官初廢一萬竅為收聲絲竹吾何與雷霆衆自驚少
聞差省事多笑豈無情社酒如堪治明年試聽鶯

十月十七日病起過鄰僧融然房看菊

閒僧仍種菊病叟偶還鄉物色憐寒蝶人情愛晚香開
遲經夏早節爽似秋涼對此增悵悵吾家徑久荒


周濂溪先生家塾銅章一枚形製奇古其裔孫
歷世寶藏來索題句敬賦一章

道州崑起千年下聖學昭如揭日星遂使大儒承統系
猶留小器觀儀刑摩挲繆篆蟲魚古洗剔銅花翡翠青
不比還珠空寶積子孫長得護精靈

天寧詩僧文緯見過

夕陽影裏鴉投樹落葉聲中共吠船久矣蓬門無剝啄
偶然葦岸有緣沿孤吟喜接金欄友一味能參玉版禪
時以冬筍見餉絕勝地爐煨芋在為師飽喫送殘年

敬業堂詩集卷三十四



敬業堂詩集卷三十五目錄

還朝集

立春後五日清溪舟中大雪留別談未菴徐任可十二韻
聞少詹姪京邸訃音時余方東北襄先馳詩四章爰

之

過梅里為竹垞先生留一

日

虎丘花信樓與馬素村別

丹陽即目

重過高旻寺留別湘兩長

老

雪後晚抵儀真

江浦農家

滁州看山

欲遊瑯邪山尋醉翁亭不果

清流關

磨盤山

池河驛

臨淮縣渡河

淮北道中

冒雨發皇莊入靈壁境泥

淖甚深兢兢有失足之慮車中口占

宿州村家有種栢作籬者戲嘲之

春寒

旅店食紅蓮米飯

永城縣署與唐殿宣飲別

道旁官柳一樹獨枯

商丘道上戲作蕪寄同年

宋山言二首

寧陵喜雨

贈正華長老

并序

伯牛岡在杞縣城東上有

冉子廟地非孔道行人罕有過而問者

重至陳留縣齋與許不器舊話二首

大雪暮抵開封湯西崖前董留飲學署二首

徐大來太守送黃河水

雪後發汴城

渡黃河

延津城北望太行山

早過淇縣

渡淇水

鄴下雜咏四首

雨後發豐樂鎮渡漳河

醜渠詩

并序

題邯鄲呂仙祠壁

臨洺關

自榕隄店騎驢至沙河

鴉食粒行

渡泚水有感於張陳事

上巳趙州道中二首

與張昆詒

定武道中

堯母泉在慶都城南源發

于平地四時不涸環城數十里間居民頗獲其

利 保陽城西望落翻山

狂風行 清明前三日重直 暢春

園觀桃花二首 同年王樓村招飲白丁香

花下 閏三月朔與德尹同直內

廷次東坡五月一日轉對韻

苑東移居與同年汪紫滄同寓紫滄有詩和荅三

首 同年佟淵若學士遊西山

歸出示見寄二絕句次韻奉荅

題顧桓吳江送別圖為紀可亭學博賦

閏月十四日西苑送春二首

閏三月二十一日蒙 恩召入淵鑒齋乘舟至瑞

景軒並珠院露華樓徧觀各種牡丹恭紀四首

寓庭槐 四月二日 恩賜櫻桃恭

紀十韻 題孫書年松下清齋圖


西苑 賜觀秧田恭紀十二韻

四月二十七日 召入無逸齋看新竹恭紀十二

韻 題王麟昭桐陰撫琴畫扇

午日西苑直廬賦雨中榴花

敬業堂詩集卷三十五目錄終



敬業堂詩集卷三十五

海寧 查慎行 悔餘

還朝集

起戊子正月盡五月

家居一年展限已滿州縣敦迫就道勢難逡巡一術士
語余曰君欲賦遂初其在壬癸之交乎余笑而頷
之既至都仍內直昔楊誠齋自江西召還陸務觀
有相賀歸館之作今集中所載朝天續集此其時
也後五年從江東賦歸果若術士言則余之退休
亦不遠矣

立春後五日清溪舟中大雪留別談未菴徐任
可十二韵

四野雲俄合孤舟凍始消東風鳴昨夜大雪灑今朝
迥成竒特斯須破寂寥連峯胥挺玉衆水畢趨苔委浪
疑鋪練投村誤斷橋微嫌經臘少偏愛入春饒亞白回
梅眼諍輕鬪柳腰近人何脈脈隨我太飄飄吟對知才
減寒禁待酒澆盡圖愁去國蹤跡咲還朝時余將北上

便欺蘭蕙終須別艾蕭溪山有迷路長恐失漁樵
聞少詹姪京邸訃音時余方東北裝先馳詩四章哭之

忽馳家信入新春凶問初傳或未真共訝緘封纔偏臘
不知屬續已經旬兩宮遣問無虛日一姓哀榮得幾
人屈指輻車定南下空將老泪灑征塵

早年同學晚同官永訣俄從小別拚去年四月杪與聲山別於揚州哭
有餘哀何日盡死無留憾古來難層霄路近瞻雙闕
淺土年深痛兩棺畢復有靈知不瞑側身天地荷
恩寬

家門先後忝科名臚唱同聽第四聲遲汝八年稱後輩

丁丑春聲山從庶常授編修余長余一月禮先兄余兩授職在甲申冬月相距八年

還鄉夢隔生從此孤踪蕙善病菟裘知復幾時營

推挽無端到不才王程何處不追陪每當宣喚慙臣

老嘗蒙東宮名對以特被恩頒恤爾衰丙戌十月姪病不入
直姪故呼慎行曰老查七發同朝皆屬望三年一病竟摧頽
斤命慎行賚賜

可憐烹鯉沈綿候猶寄音書促我來

過梅里爲竹垞先生留一日

鄭重還山約餘年準擬同如何向岐路又復轉孤蓬過
酒衝筵雪維舟拍岸風我衰公早白告別敢忽忽

虎丘花信樓與馬素村別

樓頭樹色已葱葱樓外烟光薄未融客况前遊前度夢
去年二月泊舟樓下五日乃渡江春程一雨一番風綠蕪望極空濛際
白髮痕深聚散中多感故人臨別意揮絃遙送倦飛鴻

丹陽即目

連檣芴有小車行不斷伊鴉軋軋聲夾岸坡陀帶殘雪
麥苗青上曲阿城

重過高旻寺留別湘雨長老

茱萸灣口記停船再叩禪扉已隔年四海僧皈康寶月
三生人說杜樊川閒投拄杖殘雲外倦倚征帆落照前
等是有山歸未得憐師還復望師憐

雪後晚抵儀真

白沙一道走平川野有耕犁步有船方頃瓊田鋪宿麥
幾村茅屋起蒼烟新泥滑路逢初霽枯樹攀條感昔年
曾是阻風中酒地老來情緒倍依然乙亥秋從六合
發舟阻風于此

江浦農家

江邑連年旱爲農詎免饑牛羊誰是牧雀鼠自能肥野
廢林廬在城蕪戶口稀眼看春社近倘與燕同歸

滁州看山

霧薄疎林晴曖曖雪消幽澗響潺潺曉來衝霧踏殘雪
愛看環滁面面山

欲遊瑯琊山尋醉翁亭不果

征輪兀兀鬣催斑誰遣勞薪不暫閒咫尺西亭行不到
又隨春雁度關山

土人呼清流關為關山

清流關

一綫飛流百丈清洩雲歎雨落崢嶸時平久罷中原戍
地險猶沿五代名琴筑低昂因石勢風濤起滅付松聲
瓦銚茶熟行人渴只有閒僧管送迎

磨盤山

勿論九折與千盤涉足誰如此路寬羊角旋風隨曲曲
磨牛陳跡轉團團連雲取棧紆終到峻坂迴車下最難
不是人間無捷徑漸鴻原自喜盤桓

池河驛

古驛千家聚鐘離北望孤河流近淮泗山脈盡荆塗客
餘論珠貴村醪計盍沽明朝貪早發前路入平蕪

臨淮縣渡河

暴漲衝橋斷孤城比石堅中流聲沸地別浦氣沈烟渴
虎憎關吏饑烏仰客船渡淮魚米賤隣壤接豐年

淮北道中

隔岸草擻擻人家綠映檐泥中逢驛騎樹杪展風帆暮

色遙天落春寒細雨攙故鄉行漸遠猶未換春衫

冒雨發皇莊入靈壁境泥淖甚深兢兢有失足
之慮車中口占

泥濘忽如許行行險且紆平生無闊步老去復長途不
少前車鑒誰為將伯呼短筇吾賴汝緩急幸攜扶

宿州村家有種栢作籬者戲嘲之

數椽曲木架茅茨雨打風翻大半歌多少荆榛寬束縛
屈將翠栢作樊籬

春寒

杏蕊稀疎葛葉短田家占候幾回過春光只似宦情冷
自渡江來風雨多

旅店食紅蓮米飯

見說太丘產紅蓮稻最良色疑新出水粒愛乍除芒少陵

詩除芒子粒紅浙罷鮮于染炊來軟更薌曾蒙 天上賜住年隨

駕口外官厨曾賜食一飯愧私嘗

永城縣署與唐殿宣飲別

共作風塵吏聊追風昔歡分攜頻改歲相勸一加餐酒

綠禁愁淺燈紅欲別難老深兒女戀直似故鄉看君之長子

余姪婿也余姪又為君婿時皆在座

道旁官柳一樹獨枯

同根連理枝一樣被風吹莫問榮枯意春工兩不知

商丘道上戲作蕪寄同年宋山言二首

少治春秋老漸疑宋都舊事記依稀近來六鷁多爭進
幾見因風稍退飛

梁園春半好風光紅杏開隣宋玉墻苦被時名牽率去
一官頭白校書忙

寧陵喜雨

客過中州愛物華沙隨城外氣清嘉
轆轤轉井晨澆菜
榻揆開田午種花地產木棉土人但呼為花今其下種時也
色映酒壚三尺
紵聲和牛鐸四輪車空傳杞宋遺風在喬木何曾屬世家

贈正華長老并序

去睢州城北十里道旁梵宇俗呼鐵佛寺持住長老

吳人也自言蘇州嚴墓李氏子少依巨德禪師記蒞
法名正華康熙庚申渡江北遊將赴五臺禮文殊瑞
像一夕經此坐道旁臥鐘下諦視則李正華姓名在
焉恍然悟前生之為行脚僧也茲地舊有佛廬明季
燬於兵火遂發願募化銖積寸累經二十餘年乃薙
草開林凡為殿四重莊嚴像設廊廡周遭僧寮及庖
湏之所共六十餘間仍以餘金買常住田二頃飯南
北往來緇眾今寺成而年老矣余觀而異之為詳記
始末并贈以詩

曾為行脚此經行聚鐵依稀鑄姓名重向荒村投一宿
忽從古佛證前生斧斯荆棘還初地海湧樓臺現化城

用盡萬金殘債了結跡依舊聽鐘聲

伯牛岡在杞縣城東上有冉子廟地非孔道行人罕有過而問者

垂鞭來問伯牛岡田叟扶犁過我旁指點人烟最深處一村新柳似鵝黃

重至陳留縣齋與許不器話舊二首

小許移官去回頭十四年

乙亥秋許霜岩出宰茲邑邀余同來留此兩月故人

今宦此古義兩殷然種樹添新蔭開池得美泉重來娛老眼光景勝從前

不料衝煩邑衙齋乃爾閒簿書神不滯交友性相關却餽安余素居貧諒汝艱一杯渾暖熱相顧慰衰顏

是日大風

甚寒

大雪暮抵開封湯西崖前輩留飲學署二首

二月梁園雪春風特地寒行防街路滑到及酒升寬物色符清望交情稱冷官庭花經手植何惜借人看

一代文章伯中原桃李陰青春聊作伴白髮莫相侵與國培元氣於公識苦心人知讀書貴土價比黃金

徐大來太守送黃河水

沐浴多鹽井黃流遠不侵兩牛煩重載斛水抵兼金澹泊知官味清涼鑒客心飲河還自晒滿腹恐難禁

雪後發汴城

三日大梁住北風吹不休朝來開霽景擬上渡河舟此

地多賢主吾生感舊遊吹臺桃柳色臨老重回頭

渡黃河

地勢豁中州黃河掌上流岍低沙易涸天遠樹全浮梁
宋回頭失徐淮極目收身輕往來便自歎不如鷗

延津城北望太行山

河壩一小縣傳是廩延城野燒痕猶在沙田廢不耕民
謠思樂土客飯記萊程指點鹽車路千峰馬首晴

早過淇縣

高登橋下水湯湯朝涉河邊露氣涼
高登橋朝涉河皆在城南行過
淇園天未曉一痕殘月杏花香

渡淇水

昨日渡衛源今朝涉淇水出山雖異派相望不百里遊
子中原來黃流混混耳忽然鑿毛髮顧影落清泚風塵
有薰顏夫豈水汚爾從衰旋得白正坐不知止逝者方
如斯於何觀止理寓形忌太潔外垢庶可洗

鄴下雜咏四首

湯陰城外千楊柳密罩征鞍過相州中有一株柔可愛
勸人繫馬拂人頭

一賦何當敵兩京也知土木費經營濁漳確是無情物
流盡繁華只此聲

頑礫粗礪少硯材詞人陳跡散如灰兩家搏土殊多事
曾範三臺舊瓦來

一月寒禁幾信風初從河北聽
雷震老夫準備看花眼
半日停鞭住鄴中

是夕雷雨

雨後發豐樂鎮渡漳河

雷雨已過朝復暎
早挑欲花烟滿村
夢中似聞簷滴響
渡口微覺河流渾
青山濛濛作雲氣
白浪滾滾留沙痕
滏陽北望三十里
舊事過眼徒誰論

曩與許霜岩過此有芰荷香裏到磁

州之

醜渠詩并序

磁州在漳滏二水間
大興蔣侯來知州事
始至相度地勢慨然
思復西門豹史起之
舊謀於州之士民咸
慮勞且費侯獨違群
議毅然為之醜滏陽
河為渠以

灌城南北渠之廣不過一丈深半之曲折通流建閘以驗盈縮旱潦有備蓄洩以時行之十年開稻田數萬頃歲收數十萬斛初以為不便者後皆帖帖謂侯之惠愛斯人惟斷乃成也侯名擢字試可余未識其人過其境聞父老之言有古循吏之風焉作詩以俟采風者

一州頓復西門績
南北醜流引滏河
綠樹成陰茅屋少
清渠夾鏡稻田多
年深漸欲擊魚蟹
利美兼宜植芰荷
他日誰裁溝洫志
吾詩或可當絃歌

題邯鄲呂仙祠壁

百念全消一老夫
神仙不信信浮屠
直饒贈枕成何用

鼻息如雷夢已無

臨洛關

臨洛關前春水綠草色平鋪接沙麓戍人閒雜老農耕
拾得前朝戰場鏃

自裕禪店騎驢至沙河

遙遙沙河城晶晶堆均白驢耳露雙尖驢蹄深一尺

鴉拾粒行

牛前仰而犁鴉後俛以拾牛豈為鴉耕鴉因牛得粒農
夫呵牛長苦饑不如鴉群飽食東西飛

渡泚水有感於張陳事

泚河直下常山郡誰遣當年竟不流此事終留交道恨

萬屍填塹兩人仇

上巳趙州道中二首

幾日冰開合餘寒勒柳條

十日前中州已見杏花而邯鄲以北柳未全綠氣候之不

同如水濱遊女少閒殺趙州橋

平原畱故里牢落幾人家客過誰澆酒僧來且喫茶

與張昆詒

時宰新樂

惠好自兒童相看忽老翁以君三歲長與我兩心同書
畫性成癖絃歌聲可風桑榆須早計歸路免西東

定武道中

積雪春猶潦連朝釋凍痕鶯花何太晚榆柳不勝繁貫
酒中山市騎驢代北村祗愁風色惡回首太行昏

堯母泉在慶都城南源發于平地四時不涸環
城數十里間居民頗獲其利

禹貢遺風巽壤先帝鄉耕鑿故依然繞城半食蒲荷利

源在南鄉一眼泉

道旁石碑稱堯
母鄉第一泉

保陽城西望落翮山

不斷羊腸麓東來石馬趨數峰銜落日此路出飛狐

狂風行

碧天杲杲日正中萬竅發顛狂風塵沙湍勃晝冥晦
瓦礫旋轉隨枯蓬使人口吻不得張耳目成盲聾馬牛
來往紛憧憧問之不辨西與東是時三月初柳條舒綠
桃將紅胡爲噫此不平氣春行秋令毋乃違天公我行

邂逅偶相值墨守未易當輸攻心如混沌一不鑿外感
欲入何由通適來日無影適去塵無踪盡收衆籟入橐
籥仍以一寂還虛空

清明前三日重直

暢春園觀桃花二首

煖烟晴靄互交加散作高低遠近霞行盡人間冰雪路
又來天上看穠華

已逢蛺蝶未聞鶯聞歲春遲倍有情畢竟鳳城花信準
早桃開候近清明

同年王樓村招飲白丁香花下

我從鄉園來不看鄉園花輸君京洛住久客還成家一
株丁香香高卑趁檐牙曾經上番種旋發春來葩獨抱

冰雪姿亭亭遠塵沙良辰醉其下酒美穀核嘉夕陽轉
 庭西人影花交加我鬚已半白君髮亦漸華自然法眼
 淨維摩經遠離塵埃得法眼不被紅紫遮為歡出邂逅所戒非窮
 賒後漢仲長統傳論楚楚衣服戒在窮賒

閏王月朔與德尹同直內廷次東坡五月一日

轉對韻

冠履華顛帶繞腰重來心跡負耕樵傲居未穩連宵夢
 接武還同隻日朝上苑花開如見笑故人酒熟例相要
 殘年果踐歸休約擊壤猶能頌 帝堯

苑東移居與同年汪紫滄同寓紫滄有詩和荅

三首

近傍名園遠去郊無多屋宇半編茅春蠶慣作同功繭
癸未以後借紫滄下榻自怡園社燕來尋舊識巢景與征衫隨日換官
 隨手板幾時拋卜隣絕勝清漳宅蛩駝相依剩素交
 茫茫人海此居停萬斛風埃兩葉萍草色堦除晴不掃
 槐陰門扇晝長扃同槽廐馬無蹏嚙典謁家僮互使令
 怪底羣情皆帖妥多緣君與我忘形

西苑鶯花幾閱春憶初伴直只三人暢春園向未有直廬癸未正月三日

余與聲山紫滄始奉名入直後遂為例何堪夢覺傷存歿或恐詩成泣鬼

神時家聲山甫下世所居即其舊寓也炳燭餘光銷晚境青雲岐路失前

因搏沙放手終同散東坡詩親友如搏沙放手旋復散敢向蘧廬認主

賓

同年佟淵若學士遊西山歸出示見寄二絕句
次韵奉荅

浮嵐暖翠望難分，忽枉新篇贈白雲。
賴是愛山同有癖，夢爲麋鹿也隨君。

西山何似西湖好，欲問知章借馬騎。
今日烟波重到眼，去年曾和卷中詩。

去年春杪與淵若西湖唱和

題顧桓吳江送別圖爲紀可亭學博賦

舟移碧草綠波岸，人別曉風殘月時。
此景此圖誰會得，江郎賦筆柳郎詞。

閏月十四日西苑送春二首

九十春光百五賒，綠陰陰處雨斜斜。
多情裂帛湖頭水，

長替東風掃落花

老去春遲願竟酬，多添半月踏青遊。
人間何處無歸路，也被宮鶯喚少留。

閏三月二十一日蒙 恩召入淵鑒齋乘舟至

瑞景軒葦珠院露華樓，徧觀各種牡丹恭紀四

首

宣喚欣承異數加，高從銀漢泛紅槎。
行陪閨苑神仙侶，看徧春風穩重花。
穠淡何心隨造化，丹青難貌是韶華。

先一日傳示牡丹圖譜

梅檀別殿分明到，只作華胥好夢誇。

艷極真宜過雨看，枝頭肅肅尚朝寒。
盤盂向背開瓊扇，瓔珞高低現寶鬘。
白日光中雲五色，明波濯處錦千端。

天工頃刻呈新瑞點出靈砂九轉丹

萬卉千葩未覺稠掃宮老監記牙籌薌林不斷通三島

花海無邊際十洲佳氣茵蓋蒸作霧餘霞縹緲結成樓

蓋珠一本尤奇絕徑尺重臺兩並頭

瑤階釵砌望迴環映徹層層着色山御譜新標題品

花名凡九十餘種外皆皇上新定佳名微別淺深間心如草木春知

閨天並君王霽在顏一片爐烟成百和袖中攜得國

香還

寓庭槐

庭隅雙槐樹手植知何人自我來此居婆娑忽經春初
看兔目綻漸布綠葉勻高處稍出牆密將遮比隣以茲

尋丈地無窮寓清新千章豈不多取蔭及一身閱人如
傳舍脈脈還傷神

四月二日 恩賜櫻桃恭紀十韵

燦燦華林種離離朱實香熟常先夏果貢不待炎方磊

砢初垂樹勺圓正滿筐珊瑚駢火齊沆瀣和瓊漿露帶

枝頭潤盤登葉底涼鳥鵲珠愛赤蜂釀蜜羞黃櫻桃一名櫻珠

一名昨憶西湖獻去歲初夏上駐蹕今來上苑嘗賜

珍蒙見及飽食感非常配笋厨空勅探花宴屢張唐時宰相

有櫻笋厨進分甘誰得似長侍 聖人旁

題孫書年松下清齋圖孫善山水近亦供奉畫苑

自從月給官倉粟辜負園中鴨脚葵思作散仙猶未得

更思成佛問何時

西苑 賜觀秧田恭紀十二韻

帝籍非千畝農祥視一畦初聞朱果熟旋見綠針齊料
節栽花地開醜灌稻溪自天知稼穡率土動耰犁檻
外雲生岫簾前雨作泥膏腴隨廣狹脈絡就高低剡剡
浮金淑葱蔥夾玉隄好風垂柳下斜日畫橋西多稔占
豐稔維魚兆畢圭甸師行不到勾盾典曾稽入侶金鸞
鵝歸尋木馱驥自慙輸布穀猶解勸耕啼

四月二十七日 召入無逸齋看新竹恭紀十

二韻

地關琅玕鳴天通箭栝門烟霄連別苑雷雨過前軒鼓

救風開籜洄洄水注根移栽初尚淺培護久能繁惜筍
寧充饌抽梢盡出藩幾年成翠幙一徑轉蒼根潤滴莓
苔砌高扶薜荔垣涼陰清有氣新粉淨無痕直節人皆
見虛心道亦存律堪調鳳吹名豈愧龍孫好報平安信
休辜長養 恩親從天上看不羨白沙村

題玉麟昭桐陰撫琴畫扇

暑殘涼早雨餘天人坐桐窗晝寂然百尺清陰三尺水
秋聲先上七條絃


午日西苑直廬賦雨中榴花

小院盆榴樹花時帶雨鮮施朱何太赤似火獨能然白
髮違佳節丹心感盛年蒲葵方滿眼此本定誰憐

敬業堂詩集卷三十五

敬業堂詩集卷三十五

五



敬業堂詩集卷三十六目錄

道院集

重寓城南道院

疊前韻與同年賀集洲沈

岱瞻家東亭時三子皆同寓

小憇一莖菴與靜章上人

寄祝竹垞先生八十壽二首

趙价人乞東籬詩戲贈

題同年詹允繩小照二首

秀野草堂圖歌次顧十一俠君原韻

椿樹草堂月下分韻得侵字

初伏日集張天門前輩寓齋暑甚晚雨微涼

曉仙謠效溫飛卿體 天門席上分賦宣寄盤中

果物余得文官果限官字

長林豐登吾廬圖為林鹿原賦

李簣齋招集聖安寺納涼得火字

陳月瀧大常蘭竹艸蟲畫二首

白沙翠竹石江圖為吉水宗伯李公賦六首

分咏京師古蹟得貫休畫應夢羅漢像

雨中蔣青棠孝廉邀集城南張園用南字

夏日咏物分得青奴 次韻荅周漁璜前輩見

寄 以蜜漬鮮荔枝二枚分餉漁

璜前輩蒙示絕句二章次韻戲荅

立秋日陳南麓都諫招集桂雲書屋

匡山讀書圖歌為南麓都諫賦

分咏詩人居址得東坡

牛鳴雙村棹歌為郭于宮賦四首

七月十四夜寓樓對月

題恬菴上人匡廬訪道圖二首

七月十五夜陳六謙過寓庭月下小飲

題史耕岩前輩溧陽溪山圖即次原韻四首

題邵甘來滙水村居圖

初遊城南陶然亭

種藤歌為周桐楚前輩賦

德尹請假出都志別八首

孫觀河無隱室乞題詩

座主相國澤州公有別墅在西苑旁政事之暇間

一憇焉因取唐人郎士元詩意名曰半日村高

咏成篇命余繼和恭賦一章時長至前二日

紫滄同年出示百聲詩凡天壤間有聲之物無不

入其牢籠和之不勝和也冬至日獨直西苑心

有所會偶拈四題兼寄靈隱諦輝高旻湘雨兩

禪師亦屬並和 冬夜集潛齋分韻

冬夜讀亡友錢木菴詩中有咏塵咏影二首嘆其

學道有得追和原韻

十二月初五夜夢一僧叩門乞詩夢中了了作四

言八句覺而錄之 謝院長餉白魚牛尾狸

院長疊前韻見貽追憶十六年前唐東江與余晨

夕唱酬事再疊韵奉荅


次日復惠黃柑冰鮮蕪來索詩再賦二首

鑿冰詞 次韵荅李秦川

題劉若干前輩夜雨對床圖小照

送勞介巖副憲歸里

敬業堂詩集卷三十六目錄終



敬業堂詩集卷三十六

海寧 查慎行 悔餘

道院集

起戊子五月
終十二月

余自甲申以後僦居城南道院者三年今春寓直
西郊五月 駕幸山莊避暑余仍回舊寓時同年
賀集洲沈岱瞻及家弟東亭俱需次入都樂數晨
夕遂定居焉安知後人不指此為浙西道院乎

重寓城南道院

壞壁留題在重來直似歸野鷗終自遠

舊來積水潭鷗
鶻成群今水涸

無復至者巢燕復相依獨樹風吹急叢葵雨打稀避炎宜塏
奕作計未全非

疊前韻與同年賀集洲沈岱瞻家東亭時三子皆同寓

曲尺移牀臥分曹賭墅歸浮踪雖泛泛鄉語自依依到
眼青山近梳頭白髮稀杜門深自念五十九年非東坡
云定

居之後杜門燒香深念五十九
年之非余今年恰五十九故云

小憇一莖菴與靜童上人

槐影落空庭晝長鳥聲樂我來叩門入濃綠淨如濯禪
牀聊閉目非夢亦非覺微涼何處生風動袈裟角

寄祝竹垞先生八十壽二首

當代龍門望不輕得官何必盡公卿風清李泌神仙骨

帝錫張華博物名

研經博物
賜先生匾額也

御書茗椀登堂無俗客

籃輿扶路有門生蟬魚不蝕長生字老閱巾箱眼倍明
自返初衣不記春十年鳩杖又隨身百分盞滿休辭醉
萬卷書多轉益貧荻火烹鮮鱸氣味松風吹長鶴精神
儵然出處行藏外要是江東第一人

趙价人乞東籬詩戲贈

君不識陶公而乃號東籬君又未識我來乞東籬詩我
雖未識君尚幸生同時陶生千載上知我與君誰譬如
夢中人此夢非彼知形開神或合閉目若見之孰謂淵
明心與君不相期我詩豈妄作成此一段奇

題同年詹允繩小照二首

射策成名已有餘百城高擁意何如石田佳句堪移贈

更讀人間未見書

萬卷傳家手澤新五經腹笥自紛綸也應留取餘光在

分乞去聲然糠鑿壁人

秀野草堂圖歌次顧十一俠君原韵

王麓臺仿董文敏盧

鴻草堂筆意朱竹垞有記

某樹某水與某丘曠懷往往消百憂無端弓旌被繯鎖
坐對塵壒生牢愁盧鴻草堂圖閱世已千載十志並流
傳其人儼如在問誰好事供瀟洒毋乃真迹留王宰華
亭最晚出撫本發精采今之妙手繼者誰摩詰前身應
畫師丹青一變粉墨膏寫向尺幅尤雄奇云是吳中小
秀野何斯佳境移於斯堂中主人顧十一結客論文兩

豪逸百家汎濫流溯源萬口喧傳名副實我是當年入

座人淋漓衫袖梨花春愛其披豁氣誼真丰格仿佛餘

先民宴衍之樂非絲竹水色烟光入窗綠半酣颺香風

雨來歎玉跳珠三百斛辛巳初夏大雨中過秀野草堂坐客皆盡醉鐵崖老

矣阿瑛貧空巷閒拋辟蘿屋可憐相見鳳城西僦舍還

同燕子棲猶能折柬致朋舊局促肯放詩名低我詩胡

足道依樣葫蘆畫中藁惟君癖嗜之擘紙含毫共研討

留題慣恼麓臺翁作記深慙竹垞老吁嗟乎神仙富貴

孰有無默存豈必皆清都夢中五岳巾箱圖君歸來兮

挾我俱以神為馬蓬為廬一息十反良可娛賃春齷齪

難久居乃獨憐君屋上烏

椿樹草堂月下分韻得侵字

銷夏第一集

草堂無樹月無陰但覺風生露氣侵
跌宕久嗟良會少疎狂終託故交深
閒消長夏宜甘酒老傍清光耐苦吟
從此京華比河朔壚邊知費幾招尋

初伏日集張天門前輩寓齋暑甚晚雨微涼

流金已是報初庚誰耐銅街襪穢行
伏日人歸東閣早條冰衙署一堂清
風能却扇炎何有雨解催詩晚竟成
買得荷花蕪買葉碧筒留待夜深傾

曉仙謠效溫飛卿體

頽霞照夕騰香氛丹樓絳闕五采文
蟾蜍流銀兔噴玉澹作淺碧魚鱗雲
西池宴罷瑠璃淨杯面團團墮圓鏡

露警花宮酒乍醒紫文早奏馳名姓
天雞振翰來剛風俛聽萬戶膠膠同
九州大夢呼未覺海底忽躍跋烏紅
龕髮絳節凌虛去隱隱笙歌動初曙
鶴高飛何處尋羣仙只在朝真路

天門席上分賦宣窰盤中果物余得文官果限

官字

甲拆終難透勾尖幸自先直同蘆筍淡
不比柘漿寒細剖分甘瘦同登秘色盤
文名差底用一笑顧園官

長林豐草吾廬圖為林鹿原賦

銷夏第二集

鹿原名字天下聞鹿原非鹿乃龍文
雄姿壯不受羈鞅蹴踏往往空其群
世家嗜好通八分楷法偶撫王右軍

一目之羅魏舒射此事胡足以盡君然而受知徑以
此遂釋塵褐干青雲日星煌煌懸御製目眩旁觀敢
偷睨居然給札給諭縻染翰朝朝得瞻睇天生本性終
難奪疏越么絃發孤詣爲言吾自愛吾廬豐草長林海
南滋問君結廬曾否成向人指圖先署名譬如驥駮負
轅軛心縱欲往歸無程老夫曩客三山麓正值山頭荔
支熟汝兄謂同導我入西禪冰瀉銀盆香剖玉而今道
遠歎莫致盡餅寧堪飽饒腹不如棄置兩忘情且免騎
驢度三伏珊瑚作鞭金絡頭幾時穩放華陽牛林深可
投草可臥此畫便是逍遙遊

李簣齋招集聖安寺納涼得火字

銷夏第三集

百蟲之長人爲羸孰屬欲逃無計可况當九陌鬱蒸天
萬甌烟騰塵坳堞連晨喜赴遠坊招似翼辭筴鏃隨笥
聖安寺古洵幽寂湖柳村荒尤僻左主人未到但居僧
衆客後來先揖我是早余初除鼠跡布禪榻旋掃蛛窠
開殿鎖槐榆蒼翠滴苔磚鬼佛青紅填粉堞黃金鑄橘
南曦歛空穴來聲土囊哆須臾雜沓履綦集館釘駢羅
肴核夥臨淄揮汗河朔豪物外無炎安用躲平生曾授
楞嚴偈欲賦蘭臺愁炙輶一官涉世馬加銜千緒縈身
蠶自裹動搖煖觸互起滅煩惱清涼透吹簌袖知冰釋
還成水不道風生却從火悟來性火本真空透過風輪
乃初果以上六句皆本何人可語清淨退宋劉凝之有

首楞嚴經語

清淨退菴朱

子為作記此地差堪盤礴裸偶因趁伴作良遊依舊觀心同

宴坐自然熱毒無罅入更怕虛空有堆埵好音到耳微

雨來清景回頭夕陽墮明朝俛仰便陳迹閒處知經幾

喧歌野人好涼蕪好靜風畏浮名今亦頗打鐘掃地結

願存樊南中稟序去惟願打鐘掃地為清涼山行者莫遣新詩浪傳播

陳月龍太常蘭竹草蟲畫二首

離披九畹雨垂葉天矯半庭風戛竿知是誰家舊籬落

却煩秃筆寫荒寒

蛺蝶蜻蜓盡作團幽人措意非無端春蘭作花危石底

瘦棘高於秋竹竿

白沙翠竹石江圖為吉水宗伯李公賦即用題中六字

為韻

展卷復長吟雙清到心跡秋風何處來滿眼江湖白

我公似康樂在家久忘家盤陀一片石坐閱恒河沙

巖廊四十年夙昔青霞志興到一回頭鄉山渺空翠

一寸二寸魚三竿五竿竹何必記平泉寓庭幽事足

靄靄林表雲鑿鑿波底石獨抱万里心卷舒不盈尺

過客尚留句愛茲山水邦天生好圖畫應屬李文江

分咏京師古蹟得貫休畫應夢羅漢像銷夏第四集

五千五百阿羅漢出世生天登彼岸其中尊者十八賢

龍象騰空來震旦白描晚入龍眠畫魔嬈紛拏雜真贗

豈知遠出百年前巨幅流傳磨不爛翔麟供奉貫休入蜀賜紫

為翔麟殿內供奉浮屠人詩才繪事兩絕倫自言夢與應真遇

覺來尚貌兼傳神心追手撫一揮就少緩則逝將失真

豐頤槁項多變相喜者含笑怒者瞋蓮藏已登禪月集

貫休詩二十卷名禪月集刻入大藏此圖淪落偏風塵老僧古寺深埋照

異物將歸有先兆當時畫本夢中成此夕遽然神復告

明朝有力負而趨卷軸儼隨飛錫到或疑十八缺其二

恐與李圖均被盜相傳明因寺中舊有李伯時畫渡海尊者圖不知何年為人賺去存者廣

本而僧不知也巧偷豪奪孰有無古往今來夢一覺去聲嗟嗟神

物難久貯莫逐青蚨便飛去君不見虎溪橋畔廬山路

羅漢曾為押綱具用曹翰下江州事

雨中蔣青棠孝廉邀集城南張園用南字

竹梧花藥勢相參門徑依稀到尚諳重與尋幽同野外

早曾聯句向城南亭臺易主名猶昔風雨留人晚更酣

二十五年真一夢白頭搖落感江潭甲子秋與姜西溟魏水村惠研溪輩

十七人飲酒賦詩於此尔來園亭凡三易主矣

夏日咏物分得青奴

織作交加翠留筠發冷光卷舒隨笛簟瑩滑稱藤床比

扇三秋棄如童五尺長玲瓏須會取即事有炎涼

次韵荅周漁璜前輩見寄

結習多生未易摘得公投句喜登然遠山擁髻潭如鏡

秋水平階屋似船已外形骸猶有夢不離文字豈能禪

來詩云詩人垂老例參禪祇應借佛論詩境何法真超色界天時以拙稿

就正于
先生

以蜜漬鮮荔枝二枚分餉漁璜前輩蒙示絕句
二章次韵戲荅

從知物以少爲貴兩首詩酬兩荔枝焉得領南三百顆
博君一顆一篇詩

重馬馳來幾騎塵開奩分餉孰如新老饜舌在終能辨
風味依稀似故人

立秋日陳南麓都諫招集桂雲書屋

老樹蒼藤捲幔秋旁添籬落綴牽牛鄰沾滿眼分清濁
諫紙開箱給唱酬小榻迎涼仍北嚮斜陽如火又西流
誰能不領園林趣每到君家愛少留

匡山讀書圖歌爲南麓都諫賦

九言
古體

我昔嘗吟太白廬山謠亦嘗身到九疊屏風坳谷簾瀑
布倒挂幾万丈五老峰勢競出爭嶸嶸一筇兩屐十步
八九顧東西南北上下同猿猱太白書堂不知在何許
樵翁指點此地雲松巢披榛取徑晚入青蓮谷道旁石
刻大字深而頽三尊銅佛塵昏儼泥塑半截苔碣對圻
如坤爻多年老鼠化作白蝙蝠飛攫鶴卵占斷長林梢
爾時曾作世出世間想曷不於此翦棘編蓬茅故人相
招頭白早歸去誤落塵網乃被移文嘲黃門先生今之
嗜古者展卷彷彿以漆來投膠風埃骯髒袞袞胡足道
直引謫仙居士爲神交當時手持玉尺往校士剖析白

黑銖索疇能消眼中了了忽現雲霧窟匡廬面目踴躍
隨鞭鞞還朝改官載離七寒暑百四十寺鐘鼓猶鏗敲
命工寫圖聊寓瀟洒意遭逢 聖主牙笏那得拋羽皇
新銘都付夢遊境興雖勇往跡繫烟中匏棲賢拾遺讀
書舊曾隱公擇山房萬卷亦手抄茲山圖記流傳代不
乏但恐再往之計成浮泡清泉白石有約倘勿負君其
少緩容我為鳴鶻陳曾典江西鄉試故有五尺校士之句

分咏詩人居址得東坡迎涼第五集

東坡本屬宜賓郡桃李陰從郡圃收前輩風流傳白老
後來名勝擅黃州白樂天為忠州刺史於郡圃東坡手種桃李往往見於詩句蘇公自謂出處老少粗似樂天東坡之號實本於白非偶合也平生得力在憂患此地何心

繫去留大似高鴻向寥廓雪泥指爪記曾否

牛鳴雙村棹歌為郭于宮賦四首

水淺沙平閣短篷西陂東埭往來通綠簑影裏跨牛渡
閒殺兩樵南北風

烟光霧氣不曾乾人與眠鷗共一灘湖似貫珠舩似蚌
酒如碧玉蟹如盤

見說江南水拍天而今江北占豐年自來葑塞湖邊住
黃犢生兒愛種田

小塢新開未起租四圍一色萬梢蘆紅薑紫芋村村熟
不怕人間有寇鳧

七月十四夜寓樓對月

此地殊空濶高樓更上層天孤一輪月星散萬家燈稍
覺浮塵斂俄看濁水激夜涼人不寐好景惜憑陵

題恬菴上人匡廬訪道圖二首

惠遠與少文前生定同社可惜愛山人今非住山者

五老雲松頂初登不道難近來無脚力只愛畫中看壬申

秋余遊廬山曾上五老峯觀海綿故云

七月十五夜陳六謙過寓庭月下小飲時六謙將出守

安南

十頃空潭半貯泥秋蓮晴湧綠頗黎是夕積水潭故河燈城空鼓

角聲初動月出樓臺勢盡低佳夕一歡成邂逅故交垂

老惜分攜燕堂酒熟梅花發莫忘清游補舊題六謙黔中往返

詩無見及者故戲督之

題史耕岩前輩溧陽溪山圖即次原韻四首

良常東下路斜斜小塌平橋接兩涯夢聽雷平池畔雨

覺來滿嶼是桃花桃花嶼見顧况詩句曲勝地也

栽桑種稻互回連柳色騎牛浦浦烟碧水繞田田繞郭

村翁不識縣門前

官情澹與昔賢同聊寫歸心寄雨濛此段風期難擬似

王家輞口謝東中

洮湖如鏡照人明雲霧翻從展卷生欲借公詩論米畫

筆端風雨勢縱橫米元章舊有溧陽溪山圖故云尔

題邵甘來滙水村居圖

修篁出屋柳公隄牛放前灘鴨後溪吹得讀書聲過耳
釣絲風色板橋西

初遊城南陶然亭

望遠村東緩轡遊

余寓居道院在望遠村東去亭纔二里

忽從飲馬得清

流黃塵烏帽抽身晚白露蒼葭洗眼秋風偃萬梢鋪井
底日斜雙鷺起城頭誰憐一派蕭蕭意我是江湖未泊
舟

種藤歌爲周桐楚前輩賦

迎涼第六集

吾聞管子云十年計樹木稍欲望成陰寧須校遲速君
言美蔭貴目前曠能鬱鬱待十年兩株桑木手交植意
取引架遮炎天插竹扶持工作畢屹踳未騁龍蛇質綠

痕羃作薜荔牆不與先生障西日盆池對水置廣庭細
鱗戢戢多于萍碧天倒影落萬丈夜久却涵三五星此
間露坐差不惡翻怕團團葉垂幕放梢何日過隣家留

待春風看瓔珞

家德尹潤木兩弟先後
僦居皆與先生比隣

德尹請假出都志別八首

去年夏旱今年水八口窮鄉那免饑我坐欲歸歸未得
得歸何忍阻君歸

植檜移松已兩年家書頻寄問西阡洛陽二頃談何易
稍喜躬耕有墓田

纔報歸期想候門夢中燈火花村天教此老桑榆暖
六十攜兒似抱孫

舊巢架構鳩雖拙老樹婆娑蠹已除樊圃早垂黃橘柚
開池先養白芙蓉

涉脚迷途幸未遙六年官簿咲同寮輸他勇退能過我
多賦山居少在朝弟自癸未秋假歸丁亥冬還朝今又以病告

乞官無復步兵厨米價新來貴比珠慙愧臨行留薄俸
折支能博酒囊無宋時檢校官折支例得退酒袋東坡詩有猶費官家壓酒囊之句時俸米

方議改折故及之消夏迎涼紀歲華自五月以來同人為消夏迎涼之會會必分題離筵忽漫對

黃花一尊勸汝重陽酒若箇登高不憶家
一菴猶欠結茅資竹本花栽要及時煩寄兒曹無別語

為余勤補舊柴籬

孫觀河無隱室乞題詩

丈室初從月地分木樨開後又逢君香風自滿三千界
鼻孔撩天幾箇聞

座主相國澤州公有別墅在西苑旁政事之暇
間一憇焉因取唐人郎士元詩意名曰半日村

高咏成篇命余繼和恭賦一章時長至前二日
頻傳騶唱出間坊沙路西連紫界牆一室凝香回暖律

萬峰銜雪冷斜陽圖開別墅原同謝詩取佳名亦愛唐
會得先生蕭洒意寸陰還較小年長

紫滄同年出示百聲詩凡天壤間有聲之物無
不入其牢籠和之不勝和也冬至日獨直西苑

心有所會偶拈四題兼寄靈隱諦輝高旻湘雨
兩禪師亦屬並和

梵天一晌沈寥開誰激華鯨怒吼雷日落空林無客到
烟藏遠刹有風來三生同聽人何在半夜孤眠夢忽回
一百八聲敲不斷苦教積劫墮輪迴

鐘聲

範金琢玉記同編古製難從磬氏傳小雨泠泠晨洒竹
孤燈裊裊夜浮烟軍持老衲腰同折香積空厨室並懸
最憶山堂秋講罷一聲清徹似巴蟬

磬聲白樂天詩
巴蟬聲似磬

緣木求魚爰一奇巧將法器付雕師空虛自與敲鏗應
緩急都於梵唄宜響入松濤疑掉尾枯逃世網賴捷推
憑誰悟徹前塵事身是他山啄木枝

木魚聲

三灾驀過晝沈沈窅堵波高蘭若深已向池中懸倒影
又從天半落清音石如解聽無生話風豈能搖久定心
若問此聲何起滅本來無縫杳難尋

塔鈴聲

冬夜集潛齋分韻

我愛陳學士古歡金石諧在躍不忘潛而以顏其齋寓
直少閒暇暫歸名朋儕設罍當嚴冬迨茲風日佳素心
五六輩步履相與偕君家門庭高俗子無由階相公聞
且喜初筵示模楷獸炭紅麒麟地爐宿燄埋分題命觴

咏

是日相國命
題衆各拈韻

合座忘形骸盆梅初著花行列如人排

疎影落杯底清香入奇懷五言率未成壹醉衆已皆頭
盤雜拇陣錄事主所差錢

綱卷

劉若千

興頗豪顧使君

繆湘芷 量靡涯陳子 世南 氣稍怯罰籌密於靴臥甕王

頽山浮蛆碧傾淮余惟兀然坐幸免出而哇客散二屨

留 是又余與綱菴留宿齋中 連床聽膠膠喞明朝寒栗烈雪花點銅街

詩成從馬上醉眼還重摺

冬夜讀亡友錢木菴詩中有咏塵咏影二首嘆

其學道有得追和原韵

果否蓬萊海底生本來無質自然輕狂能眯目虛空暗

細解窺窗穴隙明羊角團團多借勢馬頭滾滾似趨名

泥融雨浥終難盡那得乾坤一掃清 右咏塵

寓形宇内豈惟人幻出無端現在因我覺官骸多是假

汝依水月詎為真隨身只怪趨難避面壁誰知坐轉親

吹却油燈何處覓佛光中現舜多神 右咏影

十二月初五夜夢一僧叩門乞詩夢中了了作

四言八句覺而錄之

有目斯翳有耳則鳴人方擾擾竅聰穴明空即是色寂

于何聲混沌不鑿以全其生

謝院長餉白魚牛尾狸

樵山擘水致珍羞陋巷敲門荷見投細剝銀絲防骨鯁

爛蒸玉面惜膏油酒嘗雙榼鮮同擊 周紫芝詩買魚配酒為君嘗蘇詩酒

淺欣嘗牛尾狸糟壓三冬膩欲流東坡詩長羨淮魚壓楚糟子由玉面狸詩壓入糟益膩欲

自分生平藜藿腹得兼二者更何求

院長疊前韵見貽追憶十六年前唐東江與余

晨夕唱酬事再疊韵奉荅

憶昨狂吟不自羞瓊瑤屢報木瓜投名園擘紙移朱舫
綺陌迴鞭避碧油花下清尊殊跌宕雪中白戰也風流
唐衢去後交遊冷忍聽嚶鳴出谷求

次日復惠黃柑冰鮮兼來索詩再賦二首

登梓磊落皆三寸照眼輝煌得八枚羅帕分甘先令節
碧香留賦待新醅漸回冰齒瓊漿暖試奏霜刀綠霧開
便與魏橙同給客拜嘉真自永嘉來

橘譜出永嘉者為真柑

風味依稀似鱠殘侯鯖一月貴長安豐肌弱骨和羹美
雪片冰花入座寒欲報已無青玉案盛來兼乏水晶盤
連朝小試烹鮮手只累先生減食單

鑿冰詞

朔風兮夜號百川兮晨凍射白日兮冷光柔變剛兮石
無縫千夫杵兮聲冲冲暑然解兮塊斯融天倒窺兮尋
丈下歸無極兮馮夷之宮吁嗟乎冰堅可藏兮從爾鑿
亦既臨深兮其毋履薄

次韻荅李秦川

衰年注蟲魚如蠹蝕書史迂疎衆所易未契得之子扣
門晨有投藻句霞散綺師承得前輩出語究終始子生
本名家抗志矯波靡昨來應秋賦名溢人口耳展足抱
未攄挽頽力堪仔詩才尤秀拔氣壓侯叔迨當今大雅
宗四海歸繡水一老

謂竹垞先生

導其源揚瀾賴多士新倪

擢茗穎舊調削軟美味道庶在茲詞章寧小技君看鳴
陰鶴豈有寡和理餘風被東南矧迺桑與梓老人慎許
可僂指故無幾往往爲余言後來惟一李余雖分拙劣
夙好附群紀來篇等括張機觸難自止殘冬互酬荅塵
芥何足洗

題劉若干前輩夜雨對床圖小照

我恨不如遵渚雁行列羣飛不斷又恨不如同隊魚
朝朝在藻還依蒲可憐兄弟如相避萍梗沈浮劇兒戲
壯年作客晚筮仕投老茫無歸宿地偶然風雨一連床
僮僕旁觀詫奇事平生怕讀穎濱詩中有傷心幾行泪
關中二劉今二蘇才名宦跡兩不孤有生聚散誰免得

看取對床聽雨圖長公秀骨仙之臞次公白晳豐而腴
題詩尚爾感顛顛令我展卷增嗟吁關河南距四千里
正坐一官爲累耳不見伯淮季江屢詔徵不起肯以元
纁易布被

送勞介巖副憲歸里

十二月十五日

老伏青蒲振直聲冰霜凜冽歲崢嶸風波孰與批鱗險
華袞何如拜杖榮九死人皆危此舉一歸天特厚餘生
猶憐不及商山老鴻鵠飛時羽翼成



荷葉堂詩集卷三十六

臨軒不取簡山... 萬葉阿岐拜... 天分青龍... 五坐一宮... 荷葉堂詩集卷三十六

